

曾文正公書札卷十六

覆張凱章

接惠書具悉歛城日內可以畢工一律完好前請左軍撥三營進紫漁亭後又請其以三千人防漁者蓋以漁亭爲徽休糧路所必經也頃聞德興之賊將至婺源左軍須分剿婺源卽不能更顧漁亭聞徽城之糧足支兩月徽休以婺源爲後路祁門以景鎮爲後路均有深固不搖之象卽黟漁之防稍疎或亦無礙全局令弟千人調徽毓中丞堅持不肖敝處續去一咨一緘不知果放行否樺園若來則貴處可守可戰不來則但主堅守可也

致姚秋浦

閩賊竄陷婺源漁亭防務喫重大洪嶺腳有賊柏溪防務亦重
閣下欲峯禮豫三營改紮漁亭均歸朱鎮軍統領而江軍門駐
柏溪不動亦是補救之一法峯禮豫三營各有隱情峯營有稟
來自請裁遣極言其勇不可用禮營楊鎮魁亦有稟來告假省
親情詞痛切豫營屢請歸鮑軍統領不願歸別處統轄若此三
軍移紮漁亭人各一心閩賊果來必將不戰自潰豫營久駐歷
口深溝高壘幾費經營尤爲安土重遷不願移動凡此等軍中
隱情不可不細心體察一拂其情雖勁旅亦不得力况劣營乎
鄙意豫營萬不可動峯禮在黔在漁無甚區別介乎可動可不

動之間江軍門若移漁亭則須全軍駐漁若畱柏溪則須全軍駐柏斷不可兩頭兼顧反致誤事鄙人向不喜言分兵亦不喜言兼顧亦不喜屢調屢動此三者望閣下時時畱意

覆左季高

來示言老湘等九營卽日可以到鎮閣下親率八營前赴婺源而此間有云老湘等營將開赴祁門豈閣下另有後命耶漁亭空虛嶺防告警紛紛請兵若梅村九營能至祁門則大慰祁休軍民之望矣來示以貴軍只可分爲二支此一定不移之理景鎮老營四千人斷不可少其餘二千五百人或赴婺源或赴漁亭聽閣下斟酌辦理添募萬人之說閣下不敢遽辦自是穩慎

之著此時天下大亂吾輩行軍必須親自籌餉不可仰食他人
籌餉以釐金爲最便如自設釐卡數處則雖萬人而尚可敷衍
若並無親設釐卡則雖七千五百人而終亦飢餓錢武肅王征
權最重而其兵甚強其民亦不甚怨可見征商勝於征農閣下
倘師其意可乎潤帥神采尙好而吐血太多委頓殊甚日來可
慮有三端一潤帥病二大水三彗星未知天意竟復何如耳

覆胡宮保

專差至接惠書敬知將抵桂園靜心調養至以爲慰欵逆不止
實屬可慮審視法書神采奕奕天祚國家必佑善人宜無他
也鮑春霆請打宿松失信於江西並失信於我公旋聞安慶官

軍大捷菱湖兩岸賊壘十八座一律踏平其破壘殺斃之賊與投誠駢誅之賊實數近八千人城賊糧不過十日因照會鮑鎮仍率全軍馳赴上游此後徇逆再來禮沅當足禦之徽州克後歙休黟祁四縣尙屬平安附近之績溪旌德亦已無賊閩汀股匪由江西德興窺陷婺源旋即東去左季翁曰內由景鎮赴婺源順便至徽州休甯一帶巡視形勢徽州向不產米本屬難守然皖南爲羣盜淵藪必須設立重鎮多駐戍兵庶能防賊上犯江西之路或設戍於徽休祁門或設戍於饒州樂平戍之遠近不同兵之多寡則一也容俟議定再行詳告

台旆親統各營攻破神塘河賊壘直搗無爲州城兼攻青陽聲威大震賊膽曰寒劉官方一股自鄱陽境內折回後至建德張家灘均未住足想係回救池州青陽之故貴部餉絀異常鄙人深以爲慮尊意擬在荻港設立釐卡並抽荻港舊縣三山坐釐事屬可行目下敝處無妥員可委候卽札飭王訓導壽祺前往抽收按月解至尊處老營由吳貞階兄轉交王李二鎮閣下如遵 旨歸省兵事由王李二鎮經理餉事由貞階兄經理鄙人粗持大綱或可不至隕越洋船過境勸其不必裝米婉言開導當可順從從前劉麗川作亂占踞上海縣城官軍圍攻不下亦係洋船接濟米糧厥後以銀四萬賂洋商洋商轉爲我用上海

賊糧盡斷遂於咸豐五年正月元旦克復洋人最愛財利最講
交情凡有洋船在舊縣等處經過請囑貴部各營好好款接禮
節宜謙恭酒席宜豐厚卽有餽送水禮亦不可過於菲薄茲先
由敝處付銀五百兩請閣下轉交荻港各營專爲款接洋船零
用之公項平日感之以厚情歆之以小惠并不提起安慶城賊
之事若探明洋船有米恐其接濟然後以好言勸之以正言阻
之如再不聽然後以重利陷之彼買米與安慶城賊每米一石
髮賊可出價五兩者吾亦出五兩買之髮賊可出價十兩者吾
亦出十兩買之彼平日感我厚情臨時貪我厚利自無不允之
理曰下安慶未克斷不可與洋船構釁一經構釁後患方長閣

下亦不能回籍矣九江萬護鎮秦辦理防務極爲周妥潯城賴以保障現在南而瑞州奉新北而黃梅宿松處處皆賊萬泰辦理妥善正資熟手自不可遽議更換

覆左季高

大旆進駐婺源徽休恃爲泰山之靠貴部畱防景鎮祁門亦無糧阻之虞極慰極感貴軍僅七千人經略徽饒廣三府廿一縣之地往來策應其功極廣其事極勞而欠餉過多鄙人且憂且愧古人謂天下之患有土崩有瓦解鄙人竊謂軍營缺餉其拖欠者亦土崩也其頓斷者亦瓦解也若貴軍能自設釐卡幾處縱無補於土崩之患猶可稍救瓦解之急團練之不可用鄙人

持議頗堅今感公意諄諄當稍變前說擬令李濟元募勇五百人隨同楚軍打仗一切口糧軍械由糧台發給團練本民捐民辦之事李濟元之位望不能令建德人出資供之故仍由糧台給之也潤帥有信見寄字畫尙有精采安慶官軍將菱湖兩岸賊壘十八座一律踏平破壘殺斃之賊與投誠駢誅之賊實數近八千人較之剿赤岡嶺賊壘尤爲痛快舍弟自攻破菱湖賊壘後已將長濠縮入汛地愈短城賊愈衰萬一援賊再至集賢關官軍專顧外濠內濠防務稍鬆或無他虞彗星在太微垣北斗之間逐日南退現已退出搖光右樞之外當不足爲患矣

批姚秋浦稟

末條本有切實下手之處前數條雖空話皆仁言也閣下有仁心有遠識大本已立矣所患者在不善擇不善棄耳如有兩事宜行一急一緩則當擇其急者棄其緩者若兩事並急則當擇其尤急者棄其次急者如有兩人宜用一優一劣則當擇其優者棄其劣者若兩人並優者則當擇其尤優者棄其次優者推之行文之命意用兵之爭鬪有所擇不能不有所棄閣下若不善於棄欲諸政並舉則恐一事難成祈審擇之

覆姚秋浦

左公信來已分起進駐婺源婺源有重兵則徽休穩景鎮有重兵則祁門穩嶺內大致已安閣下仁心深識肫摯逾恆將來必

有造於皖邦第下手之處宜專而不宜博譬之食前方丈下箸必先一肴錦衣百箱着體不過數襲故以善棄之說奉獻已別具另紙矣

覆萬簾軒

春間蒙惠手緘並賜棧枝珍藥旋又遠辱瑤簡見逮闕然不報內疚無似益不欲以記室泛辭上塵清聽而賤軀爲溼熱瘡疥所困不克執筆公私廢閣彌月於茲自今春以來艱難萬狀逆黨之救援安慶其取勢乃在千里以外江西被陷一郡五屬湖北被陷二郡十一屬皆所以掣官軍之勢解安慶之圍論者多思撤皖圍之兵回顧腹地之急又有謂宜棄皖南祁黟等縣斂

兵退保江境者鄙意皖圍弛則江北之賊壹意上犯鄂境祁黟退則江南之賊壹意內犯撫建故始終仍守原議今幸徽州已復安慶賊糧垂盡可望得手惟瑞奉武義毗連鄂南諸縣一片逆氛生民塗炭鮑軍入援屢催不到水深火熱慙無以對珂鄉父老耳

覆楊厚菴

韋部隨同春霆打行仗之說前此面訂係爲春霆在下游打援賊言之至上游瑞州興治武義一帶則不相宜蓋韋部本不免於騷擾而霆軍亦略有擾民之處春霆之才善於戰守而不善於料理外事慣於平原而不慣於深山窮谷宜於坐營而不宜

於屢次移動此次赴瑞州一帶戰守少而外事多平原少而山谷多坐營少而移動多鄙人深慮其騷擾百姓大損聲名若令韋部同去則騷擾更甚恐不爲腹地之福轉爲春霆之累特此飛商請閣下飭韋部仍紮樅陽待將來攻剿舒廬等處再附鮑軍可也

覆胡宮保

惠緘敬悉玉恙稍平當可日有起色此間占者亦屢言尊體無虞也安慶自破菱湖賊壘十八座後將西北營盤紮近汛地較短防守較易援賊再至或足禦之春霆擄民船千餘在宿松拔行連日未遇順風尚在徐家橋一帶鄂之東西有何紹彩一軍

東南有成大吉一軍或足了事鮑軍卽由武穴之對岸登陸由瑞昌武甯至瑞州亦可與成軍互爲聲援侍卽日函告春霆如閣下以爲可亦望告之也左軍半紮景德鎮半紮婺源徽休祁門一帶尙屬安靜建德張家灘現亦無賊惟餉項太絀殊無良策侍瘡疾略愈李少荃梅小岩均來積閣塵牘當可漸漸清釐作梅已自益陽北旋否大阡已徙葬否書院興工否數事就緒尊恙益霍然矣

致鮑春霆

昨接潤帥信鄂中派成武臣六千人由金牛進剿興冶一帶派何紹彩三千人由咸甯進剿崇蒲一帶閣下馳赴上游不必再

走蘭溪等處應在九江登陸由瑞昌武甯至瑞州乃爲妥善瑞昌武甯二縣均與興國接壤貴軍與成武臣軍自可互爲聲援賊之悍黨在鄂境其老巢在瑞州中間必以武甯義甯爲樞紐興治一路之賊其樞紐在武甯崇蒲一路之賊其樞紐在義甯成武臣打興治貴軍打武甯則樞紐斷而瑞州之老巢可破矣不可從九江直進瑞州恐先退歸路鄂賊不得回瑞州反爲鄂湘之累且貽袁臨之患也貴軍餉項極絀一至九江卽由江西藩庫解銀濟之毓中承久有此意但患貴軍入江境太遲耳貴部此次擄船太多聲名大損一至九江登陸之後務須約束嚴肅禁止騷擾至要至囑

與易昀葵

行兵最宜講主客勞逸之分爲主而逸者常勝爲客而勞者常敗祁門出隊至白茅嶺漳嶺等處路遠天熱反主爲客未免太勞以後北路但救援柏溪西路但救援歷口此外賊雖日日犯嶺不必理他祁營種菜茂盛否喂猪肥大否有青菜有猪油糧台有米可領則此外花錢無多矣不可視屯圍爲緩圖也至囑

覆張凱章

安慶近日平安僞輔諸王由霍山太湖兩路上犯冀抄官軍之後以解安慶之圍蓋不敢直尋多公開仗令弟新募之勇聞省城發餉稍勝於徽差足慰耳徽城聞已修好至以爲慰雨洗香